




叢書集成

初編

商務印書館

涇林續記

本館據功順堂叢
書本排印初編各
叢書僅有此本

涇林續記

明 天南逸史周元璋著

黼菴柴公諱奇弘治乙卯讀書於清真觀池亭之東四月既望夜二鼓月色如畫公起步庭除忽見五童子披鶴氅麾羽扇凌空而下翩翩爲迴波之舞歌曰駕而風兮策而靈乘白鶴兮入蒼冥山青青兮海澄澄又歌曰月爲璧兮珠爲星駕赤虬兮上玄冥水淪淪兮嶽亭亭舞竟一童持蒼玉管碧雲箋歷階而上置公書几請廣其歌公歌曰天之仙地之仙攝萬靈空萬緣道可道不可傳又曰道可道兮不可傳玄且默兮天之仙天地飯兮日月懸歷萬劫兮遍大千歌畢童子喜甚公心知爲仙因長跪詢一生事童曰遇水則興逢火則滅言既冉冉駕雲向東南去公啓戶周視但見月光滿地殿閣若浮松影橫窗萬籟俱寂此身非復在塵寰間矣後公登第之年大浸瀾天累官至應天府尹致政家居數載清真觀忽罹火災焚燬殆盡公遂於是年化去詳見公遺稿中恐涉怪誕因託諸夢云

王□□諱□□太常卿□□長子善積聚富甲於崑因與一仕宦妻私通爲御史訪拿下獄仇家蜂起攻之禍且不測先是花園內用石條長五尺許支其籬忽自轉身者三離其故處幾三尺許又三轉而復其舊所又廷圭常坐於堂一鴉自外飛入墮地而死視之乃無頭者又緣事日供城隍神像于家有鴉飛集神所而啼其怪如此而迄倖免予妻父朱仰峰因買新宅大興營造時方臘月市醃魚飼匠婢臘梅持魚至地妻母自臨視之忽見一魚其腹微微蠢動心惡之伴爲不見婢移魚置木柴上復動因驚呼曰醃魚

乃復活乎。妻母叱曰：汝勿妄言。其魚遂揚鬐鼓鬣，若將騰躍者。呼衆共視，則不復然矣。或謂魚方新醢，故尙有微命。審視則魚腹已腐，問賣魚者亦云：此魚販來已久，非新醢也。予聞往索視之，魚僅長五寸許，殊不足爲怪。時方有訟事，舉家憂惶，後雖稍費，而亦無大害。

族伯祖安夫饒於財，積銀一甕，手埋于書館地下。期年發用，止鬆泥一道而已。心甚驚惶，隨泥發之，將三尺許。銀卒不見。適次子從窗前過，呼之告以故，意必爲人所竊。子乃代父發土，直至檻邊，方得其甕。啓視一無所失，取銀二錠授其子，後遂不復地藏。

嚴世蕃竊柄，諸貪淫不法狀，詳載於祖紀中。第其資性強記，善揣主意，精神壯健，能任繁劇，則若天縱之而俾逞其凶者，故老猶能道之。聊附記於左。世宗好觀經史，每至夜分，或有未解者，親硃書于片紙，令內侍持示內閣，立等回話。一夕旨至，嵩與徐階等皆不曉其義，惶悚無措。嵩曰：無過慮，卽密寫前旨，令從門隙傳出，飛馬問蕃。蕃曰：是在某書第幾卷第幾葉上。其解云何？卽飛遞回報。檢書視之，果然如其解。復命上悅。夫史冊浩瀚，卽諸學士猶未能悉記。蕃以蔭子，乃能響應若斯，非明敏博覽而何能爾？且于我朝令甲典故尤極熟諳，凡各部院有疑難事，請教于嵩，嵩弗能臆斷，試以問蕃，卽援昔證，今合于律例。凡所處分人皆帖服。又世宗夜傳旨問某事，當若何發落，調旨頗難。嵩會徐呂二老于直房細議，各令書一揭帖，云當何如。反覆參酌，終覺未妥，不敢遽謄。真時漏下四鼓矣。嵩曰：姑徐徐當呼小兒來共評定。庶不忤上意。傳命者始出，而內豎索報踵至云：上位立待。且嫌遲滯，有怒容。嵩猶豫不發。二公曰：茲事裁度再三，似

亦妥當。卽賢郎有高見，恐不能更越此。矧上命嚴迫，難以因循。嵩弗得已，迺錄上聞，須臾蕃至，示以前擬。蕃搖首曰：「未妥未妥。」頃間，內降將揭帖，用硃筆塗抹，令再擬來看。蕃因出己意調旨以進。上果依擬。二公乃服。蓋蕃善揣聖心，喜怒陽施陰設，罔弗中窾。凡得賄而欲升擢者，則覆本類置于上所喜中；脩隙而擠諸貶逐者，其本置于上所惡中。甚而誅戮忠良，亦用此術。激怒聖上，無倖脫者。以此嵩勢熏灼滔天，舉朝咸意聖明寵眷過隆，敢爾肆行而弗知。蕃潛轉移其間，卽世廟英明入其籠絡而弗覺也。若其交結內侍，密探消息，餽養臺省，鉗其口舌，僅粗迹而已。眞萬古奸雄之魁也哉！世蕃公事交冗如蠅集，飲宴御女，日不暇給。然雖沈酣寢中，或父以緊要事見詢，呼之弗應，則用金盆滿貯滾湯，浸手輓于中，乘熱提輓圍其首，三匝稍冷，更易則醒。然無復酒態，舉筆裁答，處置周悉，出人意表。故父亦懼服。凡有施行，俱不敢違。養成其惡，卒至誅夷，豈非天耶？世蕃納賄，嵩未詳知，始置笥篋，既付庫藏，悉皆充物。蕃妻乃掘地深一丈，方五尺，四圍及底砌以紋石，運銀實其中。三晝夜始滿，外存者猶無算。將覆土，忽曰：「是乃翁所貽也，亦當令一見。」因遣奴邀嵩至窖邊，爛然奪目。嵩見延袤頗廣，已自愕然。復詢深若干，左右以一丈對。嵩掩耳返走，口中囁嚅言曰：「多積者必厚亡，奇禍奇禍。」則嵩亦自知不免矣。此銀敗後車運至潞河，載以十巨艘，猶弗勝。後俱籍沒入官。

世蕃子分宜藏銀亦如京邸式，而深廣倍之，復積土高丈許，遍布椿木。市太湖石，疊壘成山，空處盡栽花木，毫無罅隙，可乘不啻萬萬而已。其心腹羅龍文富亦敵國，一日閑居，閤者報有宦僕投書，呼之入，兩人

俱大帽絹衣若承差狀。叩頭畢。跪階下不起。叩所自來。云有密語相聞。乞屏左右。令登堂問故。袖出一帖。書通家侍生王端明頓首拜。羅沈思素無相識。問爾主安在。云在門外舟中。欲躬造拜講心話。而避嫌弗敢至。敬拱候于彼。屈尊一降。重當面陳衷曲。羅初有難色。奈來人敦請再三。不得已許之。令僮潛往覘其跡。歸報云有大坐船泊河下。侍從整肅。官吏列侍若兩院按臨狀。羅乃具服往拜。主出迎。衣麒麟服。繫花金帶。狀貌魁梧。禮度矜雅。坐定茶畢。羅曰。蒙公見招。必有所諭。答曰。王某奉主命。奉屈有事相挽。舟現泊郊外。去此僅三里。晤後當自明耳。卽命解維舉棹。羅業已至彼。不能脫身。強坐談笑。行一舍許。寂無所覩。羅心竊疑。又詢舟所對云。不遠。復將十餘里。抵湖邊。遙望見一舟。指曰。此是矣。及至。則旌旗蔽日。干戟森列。金鼓大震。號炮轟天。王揖羅過船。羅欲辭而度勢不可已。強從之登。則綺筵肆設。優伶環侍。王舉酒屬客。器皆金玉。珍饌盈前。皆目所未覩者。舟傍列八槳。衆共舉棹。其去若駛。漸入大江。浩渺無際。羅驚悸坐弗安席。細叩其主何職。住何地。所言何事。答云。無勞多問。至則自知。行良久。有快船來迎。俱戎裝佩劍。呼聲動地。不久復有口者計十餘艘。共翼大舟進發。薄暮抵岸。執炬口爐。列仗張蓋。百衆前導。邀羅登輿。王隨其後。山路險仄。行復數里。忽有飛騎口稱王旨云。暮夜相見。恐不成禮。令王將軍速客宿別館。明晨奉請。語畢馳去。羅至館中。供帳甚盛。王鄭重而別。羅愈加疑猜。竟夕弗寐。黎明。王來語羅曰。吾主雄據一隅。不臣中華。公相見宜稍謙。抑毋抗禮而觸其怒。羅唯唯。及至。觀宮闕巍峩。儀從森嚴。宛若王者氣象。少頃聞鐘鼓齊鳴。報王升殿。將軍先進報命。復傳宣羅入。夾陛列甲士。露刃操戈。環侍左右。遙見殿上絳衣大

冠者南向坐。羅不得已行四拜禮。王令左右扶掖升殿。賜坐曰。勞卿遠降荒陋。無以致敬。奈何。羅遜謝。復微問中朝事。羅權宜置對。頃之。左右報別殿宴完。王攜羅就坐。儀禮嚴肅。歡飲抵暮。送歸原館。羅私詢侍者。王何姓。曰姓劉。迎予者何官。曰大將軍。如中國總兵。又問他事。悉謝弗知。天曉。羅往謝別。王促膝相對。羅請問何事見招。王曰。某居此窮陬。糧餉缺乏。聞嚴相公蓄積至富。託公作保。借銀百萬。散給軍士。後當如數奉酬。決不相負。幸勿推託。羅曰。嚴銀固多。公所須僅百一耳。何敢峻拒。第其銀悉藏地窖中。餘存并在典者止三十餘萬。數不滿百。且一時又弗能猝聚。奈何。若欲遂尊意。則發其藏可也。王詰銀藏何所。羅具對如前狀。又問發之何術。羅曰。用夫數百人。掘樹連石。挑土去椿。則銀見矣。第恐工程浩大。時日稽延。未免驚動有司。巡捕官兵。或相抗衡。未能萬全耳。公請籌之。若其可行。僕歸告嚴公。敢少慊耶。王聞俛首沈吟曰。公姑返舍。當更有處。仍令快船送羅至湖口而別。另覓舟返舍。家人驚喜。詢狀相對吐舌。此亦一大盜也。賴羅口辨得倖免耳。後朝廷有旨命撫按鈔沒嵩產。然皆藉其目前現在者進內。而山下所藏。竟不及發。事平。其孫曾因年遠人無知覺。竊起分用。迄今尙爲富室。甲于分宜云。

吳地素無狐。嘉靖丁巳。民間訛傳有狐祟。黃昏後卽出。人遭之者如夢魘狀。或據胸或扼其吭。憤懣不能發聲。甚則嚙損面目。爪破肌膚。但不至傷命。有先覺之者。持其杖逐之。則轉入鄰舍。互相驚恐。徹夜無眠。咸擊鑼鼓傳梆鈴以爲備。予鄰季昇夫婦。方夜膳畢。婦向廚房洗滌。忽見一怪物大若貓。黑色。兩目眈眈。從梁而下。婦大驚呼。季持棍來索。隱于牀邊。時比鄰俱未寢。聞有警競來援。舉火細覓。怪漸縮而小如鼠。

繞屋奔走無隙得出。值竈塘中有醋瓶未蓋，怪遂竄入其中。衆取塞掩之，置湯中煮之數沸，啓視僅得故紙一團，鐵線一根而已。他處有獲者，云其形亦相類，而各黏鳥獸毛少許于背，乃知邪術害民，非真狐也。或云爲此術者乃江西人，素習左道，假算命爲名，始寓蘇城。人有覺者，遂轉至松江，寓酒樓上。間三五日，攜雞酒魚肉令主人烹之，焚香明燭，詭云祀神，必候人靜，然後行事。主人疑爲耳報樟柳神之類，不以介意。後鄰人于牆隙窺之，見其人開衣包中，取紙剪禽獸無數，布樓板上，披髮持刀，步罡誦呪畢，以水噴之。諸物蠢動，悉從樓窗飛去，薨薨有聲。不一時，左右鄰近皆喧嚷相聞矣。其人危坐而俟，將五鼓，復步罡誦呪，諸物仍飛回墮地，復有故質，收置包中而寢。鄰人驚異，知狐怪由此無疑，質明告其主人，且欲聞官，主人慮爲所累，微洩其語，因遁去，怪亦漸息。

張國維，予從母舅也。性粗豪，有俠氣，重然諾，不畏強禦，人咸稱爲頑二。嘉靖甲寅，倭寇圍邑，任二府環攝守，募人間道往取救兵。時寇方熾，衆畏莫敢出，張毅然請行。任公壯之，乃懷蠟書夜縋城而下，晝伏宵奔，越水忍飢，艱苦萬狀，迄得請而反。任公由是大加愛任，使總土兵。後任公陞兵備，再來勦倭，檄置幕下爲近侍。任公與倭戰於松江萬里橋，敗績兵潰，公背瘡方劇，負痛墮馬，幾被害。張負之而逃，走數里，回顧則賊已尾其後矣。張窘甚，則賊已尾橋，急趨而過，置任於地，奮力拔橋面投諸水。倭不能逼，仍負任從間道投村舍，覓火種爲任療衣，標其冠于竿上，懸之簷前，衆望見稍稍集，得全師而歸。任德之，給以冠帶，至隆慶五年，善終。後于松江七壇、八壇地方，附巫言曰：我張某也。生嘗勦倭于此，今當爲爾土神，汝輩宜敬事。

我祀法以大盤盛酒肉。又須血臟羹。如其生時所嗜。禱者無不響應。又一日託巫語求療疾者曰。吾家在崑山許墓塘。遺婦孀居貧甚。可贈以銀布。吾當爲汝造福。其人如言。尋至崑。婦初不信。來者細述其故。乃受之。始知匹夫義烈。死不泯泯。

蘇郡糧長徐仁。解糧至京。寓戶部前。主人乃番子手也。仁偶飯後往外閒遊。有銀五兩藏鞵中。歸索之亡矣。知爲淘摸者取去。無可奈何。愁悶獨坐。適主人歸。問客何事不樂。徐具言其由。主人曰。無憂。當爲尋覓。斷不失故物。遂詢其銀幾何。并所遊之處。徑詣其地。揚言曰。午後曾有人至此。鞵中置銀五兩。計幾錠幾塊。裹以布包。爲若輩盜去。此人乃吾家所主者。可速還之。不然恐若輩不得安枕臥也。言訖。歸謂徐曰。客可再往前地一步。何如。徐笑曰。適往失銀。今空步何爲。主人曰。試一往。雖不得。無害也。況未必不得乎。強之再三。納鞵而行。至向所遊處。周視地上。竟無所見。悵悵而返。及門。主人迎笑曰。已得銀否。徐謝無有。入室坐定。又問答之如初。主人曰。豈有此理。試令探鞵中。則銀包在焉。開視一無所失。而其去來之迹。茫然不覺。何巧于盜若此。

嘉靖間有李千戶善戲術。往來公卿間。顧文康公尤喜之。每設宴必召令佐酒席。閒時出小技。如令打板。則牙筯自動。或三或五。遲速適中。又酒杯自行至客前。飲不酬。則杯留不去。或手執一壺。斟至數十杯而不竭。或取果實自藏袖中。頃云在某客懷間。或巾內探之果然。又臨池飲酒。將金爵佯失手墮池中。故作悚惶狀。公曰。無恐。令善泅者覓之。良久弗得。頃之出諸袖中。又令僮鎖書舍。誤遺鑰于內。將呼匠撬開。千

戶曰無勞向鎖摸索口中念念有詞躬身施揖鎖簧自躍出墮地常因嚴世蕃誕辰獻一金元寶爲壽蕃大悅厚賞之後因製酒器將金付銀匠方著火化作青煙而散蕃召李詰之對曰某貧士也安得有多金若斯蓋用以悅目耳不能適用也蕃笑而罷文康公屢以難事試之卒不能屈一日忽謂曰予思見猛虎爾能令見形否李笑曰甚易第恐驚動貴人爲罪耳因命灑掃庭除用幃蔽之焚香禹步誦呪少頃天漸昏黑若大霧狀褰幃令觀見一黑虎從空而下怒目露牙猙獰可畏從者咸驚公亦卻步而退回視庭除明朗無物乃其幻術所化爾後往游塞上不知所終

周壽誼崑山人年百歲其子亦躋八十同赴蘇庠鄉飲徒步而往既至子坐于階石氣喘父笑曰少年何困倦乃爾飲畢子欲附舟父不可復步歸舍崑距蘇七十餘里往返便捷其精力強健如此後太祖聞其高壽特召至京拜階下狀甚矍鑠問今歲年若干對云一百七歲又問平日有何修養而能致此對曰清心寡慾上善其對笑曰聞崑山腔甚嘉爾亦能謳否曰不能但善吳歌命之歌歌曰月子彎彎照幾州幾人歡樂幾人愁幾人夫婦同羅帳幾人飄散在他州上撫掌曰是箇村老兒命賞酒飯罷歸後至一百七歲端坐而逝子亦年九十八家有世壽堂其孫曾多至八十外蓋緣稟賦素厚其繇來有由矣

朱□□南昌人令□□頗著能名而性殘刻饒機智入爲給事中丁內艱歸遍覓吉壤術者言泰和觀風水甚嘉朱遂謀奪之奈創立已久徒衆甚夥計無可施適御史按部與朱同年素相厚朱具以情告御史初有難色朱誑之曰此觀不盈數畝亦無巨剝止小屋五六椽耳去之固甚易第當厚價別市地爲建殿

字如不見信。委官勘明何如。御史乃命縣丞往。朱啗以厚賄。且用給舍勢臨之。丞奉命惟謹。呈繳一如朱言。御史遂批撤觀而以地付朱。給價三十兩更造。諸道士聞之。皆憤懣不平。椎牛會衆。推一點者爲首。謀曰。此事按院作主。不可理爭。但俟其來。共擊殺之。拚一人抵罪。而吾輩冤憤申矣。衆皆稱善。朱方倖得計。偕三府統衆往撤其觀。方入門。羣各持凶械蜂擁而出。徑擣至庭中。挺交下。三府令人往援。奈衆寡不敵。乃奔告御史。卽命軍率兵三百救之。至則朱已被捶斃。曳至觀中。縱火焚其屍矣。中軍卽令撲滅。于煨燼中僅得其心一枚。餘無所存。悉擒諸道士解院。御史震怒。死杖下者大半。刻木爲朱狀。納心其中。葬于觀庭。御史親往致祭。憐其身死嗣絕。爲之大慟。舉首見宮殿巍峩幾百餘間。度其基不下百畝。歎曰。朱禍乃自撥也。吾爲縣丞所誤。致同年橫罹慘禍。向使吾知其詳。必不許之。何至是耶。歎息而去。

嘉靖辛酉歲大荒。嘉定民有列肆賣米者。其小兒年僅四歲。持銀一錠爲戲。蓋父愛其子而授之也。兒將銀埋米中。嬉玩良久。不取而入。偶人來市米。父舉斗量米與之。不知內有銀也。其人歸傾囊出米。忽得銀三兩許。喜甚。妻曰。此銀必店主誤遺于內。今爲爾所得。彼必窮追。將貽害無辜。盍速還之。必有所酬。彼此俱利。夫初不聽。妻勸諭再三。乃持原物詣彼。則店主方以失銀鞭笞奴婢。舉家皇擾。夫舉銀授主。不勝愧感。分銀一兩爲謝。歸至中途。遇鬻小豚者。用銀三錢易其一。持回。妻詢得其詳。乃說將豚散放庭中。數日後。豚發地露一瓦缶。滿中置白金幾百兩。妻見之。持歸于夫。人以爲還銀之報。友人張歎齋在彼親見。歸述其詳。

河南村民往訪親。慮途中飢渴。藏蘿蔔數枚于囊中。行數里。遇一打滴柝者。見所負塊磊。疑有重貲。遂與同行。路逢酒肆。沽酒共酌。實試之也。民以所藏爲恥。不肯啓囊。其人益信爲有物。行至亂山中。潛持石塊。從後擊殺之。解負檢視。乃蘿蔔也。慚悔無及。拾白土書石曰。我向山西打滴柝。你在河南負蘿蔔。你也錯。我也錯。若要此事明。除非馬生角。意此事甚秘。人必無知者。故云。然適有御史巡按山西。道經其處。見地有死人。而石上所書如此。遂私誌之。既下車。首令封內。凡打滴柝者。悉擒送官。一鞠得盜。遂服其辜。問其所書。則云出自無心。乃御史實焉。姓豈非馬生角之讖乎。蓋天網難逃。而假手也。

宛平李榮家累萬金。將銀二千錠置石池中。瘞于臥房庭前。蓋以石版列植花卉于上。惟婦經目。子亦弗知也。父亡。子縱情花酒。家業蕩盡。將宅轉售陳翁。母因子方浪費。祕不言。後貧窘日甚。爲人傭工。備嘗艱苦。嚴冬衣食不周。痛自悔恨。刻責母知其改行。乃爲言藏銀處。子大喜。倩人持鋤。同至舊居。求見主人。應門者意有所需索。堅拒不與通。子怒大譁。聲聞于內。陳不得已出接。詰其來由。子具道母語。卽欲入內發藏。陳又詰銀藏何所。子云在花藥欄土中。陳曰。銀是爾父物。我豈敢妄認。第此房乃吾臥室。子姑少俟。當令內人他適。任子入取。遂命具酒饌相款。遂耳語童子。令急集家衆發土取銀。事完來報。酒至慇懃勸酬。故爲延緩。子意不在酒。頃之三四起。陳翁勉留以俟。內報良久。僅出云可入矣。陳意銀必歸己囊。與子偕行至欄邊。子視土若新築者。頗疑之。令人舉鋤掘地。又甚鬆。意尤不平。將及石版。忽于石角得銀二錠。家衆環視莫不駭然。子益信爲主所竊。而此其誤遺者耳。及啓版。則滿中皆白銀。計其數得一千九百九

十八錠。足以先所得與母言相符。子喜躍過望。即將二錠謝陳翁。餘肩負而歸。陳業已許之。弗能爭也。第恨家人違其主教。罵詈不已。其婦云。適發土起石。吾親自督率。安得有銀。但見清水一泓而已。緣土汚吾指。掬水少許于外淨手。仍前掩之。方與衆竊笑其子妄言。不意水復爲銀也。陳始歎息而罷。此二事乃吾崑閔小洲在京辦事所目擊者。閔誠慤人也。言當不妄。因誌之。

盧廷選商販于川湖間。每有贏金。卽投之甕。積久而盈。用金釵一對置其上。藏于密室土中。偶爲少子窺見。俟父出私發之。用手探銀。則皆水也。遍甕摸索。竟毫無有。遂復掩之。後父欲用銀。啓藏。金釵已失去。心竊生疑。而甕滿如故。發銀至半。得一釵。至底復得一釵。覆驗銀數亦無短少。第莫測兩釵倒置之由。父後偶爲諸子道其事。少子不覺色動。父疑有故。微叩之而堅不言。後爲友人說。始傳播云。夫父所藏物。子尙不能私取。則前李翁之銀。陳安得掩爲己有。其化爲水宜也。二事頗相似。並錄之以戒貪得者。

無錫華虹山家藏古玩玉器甚多。偶有賣古董者至。出數種求售。中有玉孩兒一。其白如脂。長可五寸許。但從首至腹。俱有細墨點直灑而下。製造甚工。而攢眉蹙額。作悲啼態。見者惡其不祥。鮮有市者。華獨諦玩不去手。因詢所值。以三金對。華卽如數與之。喜形于色。賣者問市此安用。華微笑不言。固詰其故。迺命童子書房持一玉兒來。與之相比。形體頗肖。但先所得者。手持筆作揮灑狀。開口而笑。此則若因墨汚而泣耳。玉工真巧手哉。

一人將渡河。而舟未至。暫憩古廟中。忽見有戈密痕露地上。掘之得羅漢一尊。高尺餘。形貌奇古。試持示

華許酬十金。其人大喜過望。得價別去。坐客怪其大侈。華曰。我先世藏羅漢像十七尊。尙缺其一。購之久弗獲。今幸復完。敢悞價邪。因引客登樓。見沈檀作龕。坐像于內。以今所得配之。適滿十八之數。乃知世間尤物。其合散固自有期。抑物聚于所好耶。亦異矣。

章楓山位尙書。無子。撫二姪爲嗣。日者推命云。公必有後。但稍遲耳。年八十適值迎春。僮僕俱往觀。公獨坐小齋。一婢名春香。送茶至。公不覺情動。遂與私通。因有孕。過三月。婢泣告公。恐二公子見疑。潛爲所害。公啓書匣。得銀一封。重八十兩。付之。令備日用。另移置密室中。屬毋輕出。且書一絕云。八十年來遇看春。豈知弄假卻成真。生友陪匱來嫁出。生男家產合平分。書押印記付婢執。照後果生子名楫。公亡。二兄誣其來歷不明。將逐之。而吞其產。婢執公詩赴官。斷令遵公治命。平分。後楫用恩蔭爲中書舍人。楓山禮樂名臣。宜天不靳其後。

孫□家素饒裕。戊午科託親周□挾重貲往覓考官。買舉人。遇于上江。定議銀千五百兩。封金飾酒器爲質。將字眼授周歸報。孫如教。書于卷中。房考檢得之。喜甚。大加圈點。呈之主司。奈文理多謬。主司不取。房考更覓卷有疵者。伴孫卷復進呈。主司竟取彼而斥孫。如此再三。終弗能得。乃藏其落卷。至揭曉後。詣孫處授之云。我爲君費盡心機。竟成虛話。何我兩人命之窮也。泣下不止。孫感其意厚。贈以百金。房考屬曰。汝此番錯過。實緣文字未嘉。下科須覓高才者。倩其代筆。庶可萬全。至辛酉孫復得門路。而憶前言頗當。臨場浼庠友錢文臺代作。暗書字眼于內。房考遍覓孫卷不獲。索之三日。始得于別房。已先取中矣。

因以已所中卷易之孫後爲□□通判。在仕途十餘年。待錢甚厚。贈遺不可勝記。

庚午科。東倉曹監生。應試至京。邀友人沈遂洲爲伴。曹有一童。能書識字。性敏捷。曹甚喜之。時刻不離左右。至七月終。童忽言歸。沈竊疑之。而弗解其故。至初六日。曹拉沈看迎考官。攜手立店家簷石上。見諸考官從人。俱青衣大帽。乘馬而來。中一人用馬鞭挑開眼罩。顧曹微笑。沈亦見之。曹以手捏沈一把。卽下階歸寓。至夜飲。沈試詢曰。日間所見執鞭者。頗似君家某童何也。曹笑弗答。沈亦不敢更問。場事完。曹出赴宴。沈獨留守舍。偶往廚房取水。淨手見一人坐青布墩上。服飾弗類其僕。詰之。其舌侏僂似江右人。詢所從來。語甚支吾。沈心知之而不露。第時往覘其動靜。見人坐墩上弗少移。若如廁則挾之而往。夜用爲枕。而臥。意其中必重貨也。至揭曉。曹果中式。報喜者在寓喧嚷。觀者肩摩。而前童從人叢中歸矣。沈詢久在何處。笑而不答。少頃往廚中索前人。則并包俱無蹤矣。後細察之。乃知童充房考家奴。入簾代主覓卷。而廚中人則房考令守質物者。榜出則一去一來。各歸原主。此沈所細述者。

潘□□諱□□□人。父□□業丹青。其子時已游庠。有科舉。偶鄉間富翁吳姓者。構巨室。因日促上梁。未及施采畫。旣成。嫌其太樸。洵爲加飾。搭鷹架令潘棲息其上。而運筆焉。辰而登。盡酉而下。幾一月矣。吳有子亦放科。持重賞倩人買字眼。持歸授子。至堂中發封啓視。忘梁上有人也。諷誦再三。遂入內室。潘諦聽已得其詳。夜歸潛告其子。入場如父教。書卷中考官檢得之。卽加圈點。得中。迨填榜拆號。則潘姓而非吳也。當時有聽生鬼之謠。

場中傳遞懷挾弊端無窮。其術甚巧。隔年募善書者。蠅頭細字寫于金箔紙上。每葉一篇。工價三分。經書俱千篇。厚不盈寸。二三場亦如之。或藏筆管中。或置硯底。更有半空水注夾底草鞋之類。又用藥煮寫于青布衣袴上。毫無形蹟。將壁泥糝上。旋即拂淨。則文字立見。名曰文場備用。每副價銀百兩。其傳遞者重巡綽官舉小簿授之。至點進時。官先潛候于儀門內。聞唱名聲。即來接入。送至號房。乃出諸袖中授之。毫無覺者。臨別。官喚守號軍分付曰。此兵部某爺公子。要小心伏侍。如違。細打不恕。軍被哄嚇。任其鈔寫。不敢側聲。後爲諸生稟明御史。將諸武弁封鎖別室。不許擅入號舍。其弊始絕。今聞應天府吏書得賄。將繳柄打通。藏小簿在內。并潛貯于擡印箱衣箱坐櫃交底中。至點名則取小簿隱于尹丞坐椅褥後。隨呼名則隨子。百不失一。蓋臨場各官行李。雖各加搜檢。而未有搜及尹丞之繳柄與隨身擡箱者。以故終不發覺。又聞謄錄生俱積年書手。謀充預與富。粟定計。探決科秀才文。必入穀者。告以姓名。候分卷到。則祕藏之。移秀才文謄爲監生卷。監生文反謄爲秀才卷。監生得中。秀才毫不知借己之文。秀才見擯。實監生文理荒謬所貽也。豈不冤哉。今欲清此弊。必先彌封。而後送謄錄。庶幾少杜乎。又富豪將賂屬託受卷所書吏。先訪各處名士。令其牢記。俟交卷時。接得佳卷。即壓于各卷下。不即封固。候至夜分。受卷官倦臥。或打盹。即潛懷前卷投于行賂者。將文盡錄爲己作。而毀棄其卷。其弊最隱最毒。又或行賄于彌封房書手。將平日有文名之卷。割去卷面。而將文綴于己名下。如順天丙午科中式第四名監生鄭汝鑣卷。乃割福建恩貢馬□□者。尤爲可異。馬于癸卯年應貢入北監科舉。不中。遂留京不歸。下帷發憤。期于必捷。是年館

于同鄉林主政家。初場完。將七作錄示主政。文果擅場。許以魁元之選。及揭曉。則被斥。馬憤懣欲自縊。主政亦大爲不平。卽令馬□人往順天府索其落卷至。則毫非馬文也。意必謄錄生誤。寫于他人名下。令馬往順天遍搜落卷。而迄不可得。及傳五魁墨卷至。主政閱之。其第四名文與馬所作七篇一字無異。知中必有弊。亟以告馬。令具狀訴于監臨御史。拘謄錄彌封兩房書手鞠審。實係彌封書手受賄。而割馬卷面作弊使然。遂具疏上請各擬遣戍。而馬發監肄業。雖再經疏辨。而禮部終不爲改正。人皆惜之。似此等弊竇。非當事者加意嚴防。惡能絕其禍本耶。

有刑部主事王。失其名。善決疑獄。在部某月。歷年冤係者悉爲昭雪。競呼明神。先令山東時。有民婦歸寧。因居鄉路遙。四鼓而起。俟于城闔。門旣闢。衆爭出。各散去。婦乘月色獨行。適樵夫尾其後。至野外握斧大呼向婦。驚仆倒地。遂強姦之。盡擄首飾而去。婦號泣奔還。偶遇令出。攀輿哀訴。帶至縣中。詢樵夫作何狀。婦曰。賊面黑而圓。長五尺許。頭裹白手巾。身穿藍布衫。腰縛纏袋。單袴草履。手執利斧。肩負繩擔。令曰。吾當令人往捕。汝第言失去首飾已耳。毋露姦情也。遂選捕快十餘人散往四隅。大呼云。早有樵夫如此狀貌。如此服飾。至山中刈薪遇虎見噬。必有聞聲而應者。詢得其實。卽潛伏于左右。俟其人歸。□□□□勿令入門。有所轉換也。衆役奉命號于遠近。寂無問及。後至委巷中。有婦方補舊衣。聞之驚起曰。此吾夫也。問信自何來。役對以親見。復詳道其容貌衣服。婦曰。是矣。痛哭不止。役者佯寬解之。辭去。陰伺于巷口。日將晡。夫果歸。方及門。役人卽縛之赴官。百計哀求與妻一訣。不許。擁至縣庭。召婦審視。貌頗類而首無巾。